



**Réponse du Ministre du Travail à la question parlementaire N°2786 du 14 août 2025 de l'honorable Député Georges ENGEL et de l'honorable Député Mars DI BARTOLOMEO concernant « Refus de préretraite pour anciens salariés de Liberty Steel ».**

**Fro N°1: Wéi vill Persounen, déi bei *Liberty Steel* geschafft hunn, wiere jeeeweils eligibel fir eng vun den existéierende Preretraiten?**

Zum Zäitpunkt vun der Faillite, déi den 29. November 2024 gesprach gouf, ware 16 Salariéen vun dëser Entreprise schonns an der Prérétraite postée an eng weider Prérétraite postée war schonn op den 1. Dezember 2024 autoriséiert ginn. Deemno huet de Fonds pour l'emploi ab dem 1. Dezember 2024, d'Indemnités de préretraite vu 17 Leit vun dëser Entreprise iwweholl. Dës Persounen ginn deemno direkt aus dem Beschäftigungsfonds bezuelt. Den Aarbechtsministère huet bis dato nach keng Ufro kritt vu Salariéen, déi aktuell vun der ADEM als Chômeur indemniséiert ginn an déi d'Conditione vun der Preretraite postée erfëlle géifen, fir an de Bénéfice vun dëser Mesure ze kommen, sou wéi et vum Gesetz virgesinn ass.

Vu datt de Betrib seng Aktivitéiten agestellt huet an och virun der Faillite net éligibel war fir d'Preretraite progressive, ka kee vun de Salariés an de Bénéfice vun dësem Type vu Prérétraite kommen

Wat d'Prérétraite-ajustement ugeet, ass et esou, dass d'Salariéen vun der Entreprise just an de Genoss vun dëser Mesure kënnen kommen, wann eng Konventioun Prérétraite-ajustement vum Patron beim Aarbechtsministère ugefrot gëtt an dëst a Fäll wou d'Firma zougemach gëtt oder a Situatioune wou Kënnegungen verhënnert solle ginn. Eng solch Demande ass vum Employeur net un den Aarbechtsministère adresséiert ginn. Och d'Propose vun engem Plan de maintien dans l'emploi huet leider keng Friichten gedroën, sou datt d'Prérétraite och nët iwwert dee Wee méiglech war. Am Kader vun enger Faillite kéint déi Konventioun och vum Curateur ugefrot ginn. Dëst ass awer nët geschitt, well de Curateur, mat Récksproch vum Juge-commissaire, d'Aktivitéiten vun der Firma nët weidergefouert huet an deemno och kee Personal méi do war, fir eng Konventioun unzefroën. Zum Zäitpunkt vun der Faillite war d'Firma also nët éligibel fir d'Mesure, sou datt och keen Ex-Salarié aus dem Chômage vun dëser Mesure kann profitéieren.

**Fro N°2: Ass et richtig, dass den Aarbechtsminister keng Konventioun fir eng Prérétraite-ajustement fir d'Mataarbechter vu *Liberty Steel* maache wëll? Falls jo, aus wéi enge Grënn?**

Et ass net richtig, dass den Aarbechtsminister keng Konventioun fir eng Prérétraite-ajustement fir d'Mataarbechter vu Liberty Steel maache wëll. Et ass esou, datt déi legal Konditioune fir d'Ofschléisse vun enger Konventioun fir eng Prérétraite-ajustement net erfëllt sinn.

Den Artikel L. 582-1 vum Code du travail gesäit folgendes vir : « L'employeur peut solliciter l'admission de son personnel à la préretraite-ajustement par convention conclue avec le ministre ayant l'Emploi dans ses attributions (...). Il en est de même des curateurs d'entreprises déclarées en état de faillite (...). »

Weder vum viregten Employeur, nach vum Curateur, ass eng offiziell Demande gemach ginn, fir d'Personal kënnen an d'Préretraite-ajustement ze loossen. Et sief hei och nach eng Kéier ugemierkt, datt de Curateur d'Décisioun geholl huet, d'Aktivitéite vun der Firma nët weiderzeféieren. Dat huet als Konsequenz, datt all Arbechtsvertrag zum Datum vun der Faillite automatesch an vum Gesetz hier obgeléist gouffen. Dementspreechend huet de Curateur och kee Personal méi à sa charge, daat an de Genoss vun enger Préretraite-ajustement kéint kommen.

Bis haut ass deemno keng Konventioun Préretraite-ajustement ofgeschloss ginn, well éischtens vum viregten Employeur keng Demande gemach gouff an zweetens keng gesetzlech Basis existéiert fir d'Leit, déi nët méi Deel vum Personal vun der Firma, respektiv vum Curateur sinn, iwwert eng Konventioun an d'Préretraite-ajustement ze loossen.

**Fro N°3: Falls et an dësem Dossier ëm eng aner Aart vu Preretraite geet: Ëm wéi een Dispositiv handelt et sech an op wéi eng legal Basis stëtzt de Minister seng Entscheidung, fir dës Preretraité fir déi fréier Mataarbechter vu *Liberty Steel* net ze accordéieren?**

Deen Aarbeschtsminister kann confirméieren, datt et net em eng aner Aart vu Préretraite geet.

Et gëtt laut den aktuelle gesetzleche Bestëmmunge just 3 verschidden Aarte vu Préretraite, à savoir d'Préretraite-ajustement, d'Préretraite pour travailleurs postés an d'Préretraite progressive. Eng aner Aart vu Préretraite gëtt et net, a kann deemno och net accordéiert ginn, a stoung och nie zur Diskussioun. Fir eng vun den 3 genannte Préretraite accordéiert ze kréien, mussen natierlech déi jeeweileg Krittären aus dem Gesetz erfëllt sinn.

**Fro N°4: Ass et richtig, dass et an de leschte Méint Echange mat de Gewerkschaften zum Fall vu *Liberty Steel* gouf, wou d'Preretraite als Outil fir d'Vermeide vu Chômage zeréckbehale gouf? Falls jo, firwat huet den Aarbeschtsminister seng Meenung geännert?**

An de leschte Méint gouf et effektiv ë reegelméissegem Austausch tëscht dem Aarbeschtsministère, dem Wirtschaftsministère an de Gewerkschaften fir den Ex-Mataarbechter vu Liberty Steel kënnen eng adäquat Léisung ze biddne, respektiv fir eng Chômage-Situatioun ze vermeiden. Eng vun de Mesuren fir den Chômage ze evitéieren, ass natierlech och d'Préretraite. D'Préretraite ass awer nët déi eenzeg Measure, déi existéiert fir den Chômage ze vermeiden, oder den Impakt dovunner ze miniméieren.

Trotz deene ville Diskussiounen an Hëllefstellungen säitens dem Aarbeschtsministère an dem Wirtschaftsministère, ass et ze bedauern, datt vum Employeur all proposéiert Léisungen nët zréckbehale gouffen (Plan de maintien dans l'emploi, Préretraite-ajustement, etc.).

Säitdeem d'Faillite gesprach ass, a vum Curateur d'Décisioun geholl gouff, d'Aktivitéite vun der Firma nët weiderzeféieren, ass och d'Méieglegkeet vun der Préretraite-ajustement verfall. Déi Ex-Matarbecher, déi nach weiderhin um Areal tätég ware, fir d'Sécherheet vum Site ze garantéieren, gouffe vum Curateur ob Basis vu Frais de notes bezuelt. En Arbechtsvertrag tëscht deene Leit an dem Curateur huet also net existéiert, sou datt och déi Leit nët an de Genoss vun enger Préretraite kënnen kommen.

Dementspreechend huet den Arbeitsminister seng Meenung nët geännert. Den Accord vun enger Prérétraite ass ëmmer un d'Erëlle vun de legalen Éligibilités-Krittären conditionnéiert.

Fir ofzeschléissen, ass et wichteg ze betounen, datt fir d'Ex-Matarbechter vu Liberty Steel, déi vun der ADEM indemniséiert ginn a genuch Nuetschichte geschafft hunn, vum Gesetz hier nach ëmmer d'Méiglechkeet besteet, fir eng Prérétraite postée kënnen unzufroen.

Luxembourg, le 12 septembre 2025

**(s.) Georges MISCHO**  
**Ministre du Travail**